

Sommaire d'instance.

Pour Maistre Adrien le Fevre, Prestre, Docteur en la Faculté de Theologie de Paris, ancien Regent de l'Vniuersité, pourueu de la Thresorerie de l'Eglise Cathedrale de Roüen, appellant.

Contre Maistre Robert du Val, aussi Prestre, Docteur & Lecteur en Theologie, Prieur Curé de S. Leger, intimé.

Et encores.

Contre Maistre Nicolas l'Archeuesque, aussi appellant.

L'Vniuersité de Paris, interuenante d'une part.

Et Monsieur l'Archeuesque de Roüen, interuenant d'autre.



Il est question en l'instance de la Thresorerie de l'Eglise Cathedrale de Roüen, qui a vaqué au mois de Iuillet 1640.

Trois la disputent, le Fevre, du Val, & Nicolas l'Archeuesque.

Ce benefice ayant vaqué au mois de Iuillet, mois de rigueur, affecté aux Graduez nommez, & n'estant de sa nature en aucune sorte electif, mais purement & simplement collatif; le Fevre soustient que la prouision qu'il en a obtenuë en Cour de Rome au refus de l'Ordinaire en vertu de ses degrez & de sa nomination ne peut receuoir de difficulté estant conforme à la disposition de la pragmatique & du concordat, & des Arrests lesquels sont produits.

Qu'il exclut du Val, pour ce qu'il n'a pour titre audit benefice contentieux que la collation pure & simple que luy en a faite Monsieur l'Archeuesque de Roüen, qui estant faite d'un benefice qui a vaqué en vn mois de rigueur, ne peut pas valider au prejudice du droit de nomination d'un Gradué nommé.

Et que quand du Val y viendrait en vertu de ses degrez & de sa nomination, le Fevre luy seroit tousiours preferab'e, comme estant plus ancien Gradué nommé, suivant aussi la disposition du concordat.



Le Fevre est nommé en mil six cens trente-quatre.

Du Val ne l'est qu'en mil six cens trente-neuf.

La nomination de le Fevre est deuëment notifiée.

A l'esgard de Nicolas L'archeuesque.

Le Fevre soustient qu'estant ancien Regent de l'Vniuersité de Paris, rapportant attestation en forme authentique de sept annees de Regence, il luy doit estre preferé, encorés qu'il soit postérieur en nomination suiuant la disposition de l'article 54. du Statut de la reformation de la Faculté des Arts en l'Vniuersité de Paris verifié en la Cour en 1598. qui donne aux Maistres és Arts qui ont exercé la Regence par l'espace de sept annees la preference aux droicts de nomination sur tous les Graduez nommez, à la reserue des Docteurs en Theologie seulement.

En voicy les termes.

Vt plures ad docendum inuitentur, Magistri Artium qui per septennium continuum absque intermissione & citra fraudem, in celebri Collegio publice docuerint, preferantur omnibus Graduatibus in iure nominationis, exceptis Doctoribus in Theologia tantum.

Suiuant encorés la disposition de l'article 17. de l'appendix de la reformation de la Faculté des Arts aussi verifié en la Cour, qui donne le mesme priuilege à ceux qui ont fait la fonction de Principal en vn College où il y a exercice *Gymnasiarchæ qui per septem annos in celebri gymnasio cum laude rexerint eodem priuilegio comprehendantur in beneficiorum nominationibus quo preceptores qui per totidem annos docuerint.*

Voila l'establissement du droict de le Fevre à l'esgard des deux parties qui le luy contestent.

Il faut maintenant examiner ce quel'on oppose à l'encontre & de part & d'autre.

Moyen de du Val.

Quand à du Val il soustient que la Thresorerie de l'Eglise de Rouen estant vne dignité, n'est point sujette à la nomination des Graduez les dignitez en ayans esté deschargees par le second article de l'Edict de 1606.

Mais auparauant que du Val peust tirer vne bonne consequence de cét, Edict il faudroit qu'il eust bien iustificié que le benefice dont est question fust vne dignité.

Les preuues qu'il en rapporte sont foibles, ne resultans que de quelques actes on la Thresorerie dont est question est enoncé en cette qualité.

Mais dailleurs ne se voyant point qu'il y ait aucune jurisdiction attachee à la fonction, qui consiste seulement en la garde des ornemens sacrez, il n'y a pas lieu de dire qu'aux termes de droit, elle puisse estre vne dignité dont la vraye marque est la iurisdiction, mais seulement office personat qui a la preface dans le Chœur ou Chapitre.

Cecy suffira quant à ce point qui n'est pas le plus important.

Car encores que l'on demeurast d'accord que ladite Thresorerie de Roüen fust vne dignité n'estant point electiue, il ne s'ensuiuroit pas qu'elle fust exempte de la nomination des Graduez.

Il faut maintenant respondre à la declaration de 1606.

Le Fevre dict premierement & en general que pour se preualoir de cet article de la Declaration de 1606. au preiudice de son droit, il faudroit montrer qu'il auroit nommement & expressement derogé aux titres qui ont estably les droits des Graduez nommez.

Ces droits ayans esté establis par des Conciles si saincts & si venerables en cet Estat, par des pragmatiques de nos Roys si solennellement faites en l'Assemblée des Estats avec tant de connoissance de cause, il n'est point à presumer que cette Declaration ait pû ny vouloir derogier par des termes vagues, generaux, & indefinis comme sont ces mots à l'auenir, vne derogation expresse & precise estant à tout le moins necessaire.

Dailleurs, que cette Declaration a tousiours esté considerée comme vn Edict Butsal, que l'on sçait auoir esté obtenüe de la bonté de Henry I V. par les importunitiez du Clergé, lors du secours qu'il desiroit d'eux, & pour lequel en effect il contracta avec eux pour subuenir aux necessitez de l'Estat.

Qu'elle n'a aussi iamais esté tirée en consequence, l'usage en ayant reduit perpetuellement la disposition aux termes de droit commun, par les Arrests qui en ont esté rendus de temps en temps & produits par le Fevre, qui sont autant de preiugez infaillibles pour luy.

Vsage dont Messieurs du Clergé ont d'autant moins de sujet de se plaindre, qu'eux mesmes ont restrainct la disposition de cette Declaration par l'interpretation qu'ils luy ont donnée en des apostilles qu'ils ont fait imprimer.

Et pour iustifier tout ce que dessus nettement, & avec ordre.

La Cour est tres-humblement suppliée d'observer que Messieurs les Euesques, qui sont tousiours tout ce qu'ils peuvent pour ne pas fournir gratuitement le secours qu'ils doiuent au Roy dans les be-

ARTICLE 2,
Et d'autant que les dignitez des Eglises Cathodrales requierent aussi personnes de qualité & suffisance dont neantmoins le choix est souvent osté aux Collateurs ordinaires à cause des Indults & graces expectatiues nous voulons que lesdites dignitez en soient à l'aduenir deschargez tant enuers les Graduez qu'autres.

L'Edict de 1606. ne parle pas des personats ni des offices, la Thresorerie de Roüen est Office de Sacrifice, & ainsi n'y peut estre comprise.

soins de l'Estat, sont en possession de présenter à sa Majesté des cahiers de remonstrances, à l'enlherinement desquelles le Conseil ne se rend pas d'ordinaire beaucoup difficile, estant vn moyen asseuré pour disposer aisement ceux du Clergé à se soumettre aux conditions des contrats que le Roy voudroit faire avec eux.

Aussi en 1596. sur le point que le Roy Henry III. estoit de contracter avec eux, ils presenterent leurs remonstrances, où entr'autres choses ils demandoient à sa Majesté *que les premieres dignitez des Eglises cathedrales fussent à l'aduenir deschargées de toutes graces expectatives.*

Ils n'eurent pas beaucoup de peine à en obtenir vne Declaration, mais ils n'en peurent iamais obtenir l'enregistrement ny la verification, & ainsi elle demeura sans effet.

Mais en l'année 1606. le Roy ayant encors besoin de leur secours, sur le point de contracter à cet effet, ils renouellerent leurs premieres propositions, & la Declaration qui en fut lors expediee fut dressée sur celle de 1596. & l'article dont on se veut auourd'huy preualoir, fut transcrit de cet art. qui portoit *que les premieres dignitez des Eglises cathedrales seroient à l'aduenir deschargées de la nomination des Graduez*, & l'on osta le mot de *premieres*, mettant seulement *les dignitez* en termes indefinis.

Par là la Cour iugera en premier lieu, si vne Declaration obtenue sur des considerations de cette qualité, peut estre entenduë auoir pû ou voulu deroger aux Conciles de l'Eglise Gallicane, mesmes en des cas auxquels les Concordats n'ont pas voulu toucher aux droits des Graduez, qui ont tousiours maintenu en vigueur les bonnes Lettres, & les bonnes mœurs. La corruption n'ayant commencé à naistre principalement dans la discipline Ecclesiastique, que par les abus qui ont esté introduits au contraire.

En second lieu, quoy que cette Declaration ait esté verifiée en la Cour, ce ne fut qu'apres deux années de resistances, la Declaration est de 1606. & la verification de 1608.

Mais la Cour n'a iamais entendu que l'enregistrement en peust faire prejudice aux droits de l'Vniuersité, qui ne fut ny ouye ny appellée, l'un & l'autre estant necessaire.

La premiere atteinte qu'ayent receu en France les droits des Graduez, ce fut par le Concordat qui abolit les Elections, dont la voye estoit tousiours tres-avantageuse aux Graduez.

Lors qu'il fut question de le verifier, La Cour apres auoir député
plusieurs

plusieurs fois vers le Roy, qui estoit pour lors à Amboise, afin de luy faire tres-humbles remonstrances sur ce sujet, & ayant receu tres-expres commandement, & de bouche avec menaces, & par escrit de passer outre.

La Cour, dis je, donna Arrest, par lequel elle ordonna que l'Vniuersité seroit appellée pour dire ses moyens d'opposition, sur lesquels il est vray que la Cour ne peut pas faire droict, la liberté luy en estant ostée par les lettres de iussion qu'elle receuoit de iour en iour.

Et sans doute la iustice de la Cour auroit suiuy cette exemple, lors qu'il fut question de verifier ladite Declaration de 1606. si ce n'est que voyant l'expresse volonté du Roy, apres des resistances de deux années, elle preiugea, par sa prudence, que si l'Vniuersité y eust esté appellée & ouye en ses moyens d'opposition, & que sans y faire droict (la Cour n'en ayant pas la liberté,) la Declaration eust passé; l'on pourroit à l'auenir opposer à l'Vniuersité l'Arrest de verification, pource qu'il auroit esté contradictoire; mais aussi que ne l'estant point, rien ne l'empescheroit d'ouurer la bouche pour la defense de ses droicts aux occasions, comme en celle-cy où elle soustient par ses moyens d'interuention, & par la bouche dudit le Fevre, que la Cour n'a point entendu faire preiudice à ses droicts par l'Arrest de verification, n'ayant point esté ouye ny appellée, comme elle l'a tousiours esté lors qu'il a esté question de les defendre.

Et ne faut pas s'estonner si la Cour par son Arrest de verification a modifié la Declaration en termes expres à l'esgard des indultaires.

Car les indults estant vn ancien droict particulièrement accordé aux Officiers du Parlement de Paris, si lors de la verification ils ne les eussent nommement exceptez de la disposition de la Declaration, ils n'auroient pû iamais se parer par cette defense, *qu'ils n'auroient esté ny ouys ny appellez*, puis qu'eux mesmes qui y sont les principaux interressez l'auroient autorisée par leurs suffrages.

Aussi est-il tres-constant en troisieme lieu, que la Cour qui n'auoit verifié cette declaration de 1606. qu'en 1608. deux ans apres, en a reduit perpetuellement autant qu'elle a pû la disposition aux termes du droict commun en faueur des Graduez nommez, leur ayant adiugé en vertu de leurs nominations, les dignitez des Eglises, tant Cathedrales que Collegiales, n'en ayant iamais reserué que les dignitez electiues soient electiues confirmatiues, soient electiues col-

Car si la Cour a tousiours bien fort consideré les droicts des Graduez, comme ayant esté introduits en faueur des lettres & des bonnes moeurs, si est-ce qu'elle a eut tousiours en tres singuliere recommandation les elections, & tout ce qui en auoit quelque image ou quelque ombre, comme ayant esté la principale voye, par laquelle, selon l'ancienne institution Canonique, vn chacun estoit admis aux ministres de nostre Religion.

Mais hors les benefices electifs, elle a perpetuellement adiugé aux Graduez en vertu de leur nomination, nonobstant la declaration de 1606. tous les autres benefices soient personats offices ou dignitez.

Entre vne infinité d'Arrests qui ont esté rendus, en voici les plus celebres & les plus recents, & qui seruent de maximes au Palais.

*Cet Arrest est
produit par le Fe-
vre sous la cote
G, de sa produ-
ction principale.*

Le premier est pour la Preuosté de l'Eglise Cathedrale de S. Pierre de Poitiers, qui en est la premiere dignité, donné en la grande Chambre au raport de feu M. Bouguier, le 5. iour de Fevrier 1631. par lequel vn nommé Texier fut maintenu & gardé en la possession & iouissance de ladite dignité de Preuost, en vertu de son degré & de sa nomination, nonobstant l'interuention du Chapitre, qui ne se sentant pas mesme assez fort de la declaration de 1606. pretendoit que ceste dignité estoit electiue, & demandoit estre maintenu en son droit d'election.

Le second est pour l'Archidiaconé de l'Eglise Cathedrale de Bayeux du 28. iour d'Aoust 1632. par lequel vn nommé Matan fut maintenu & gardé en la possession & iouissance de ceste dignité en vertu de sa nomination, nonobstant qu'il fust soustenu de la part d'un nommé le Coq sa partie, que ledit benefice contentieux estant vne dignité deuoit estre déclaré exempt de la nomination des Graduez, conformément à ladite Declaration de 1606.

Ceste contestation se void dans la requeste employée par ledit le Coq pour contredits contre la production nouuelle de Matan, qui ayant produit ledit Arrest de la Preuosté de Poitiers, qui prononçoit pour les dignitez en faueur des Graduez nommez. Le Coq n'y peut donner pour contredit que l'allegation d'un faict dont il ne rapportoit point de preuue, & qui estoit mesme contraire aux termes de la contestation, assauidir que ladite Preuosté de l'Eglise de Poitiers n'estoit point vne dignité, mais que l'Archidiaconé de Bayeux en estoit vne: & sans auoir esgard à ces moyens, la Cour prononça en faueur du Gradué nommé.

Letroisiésmé est vn Arrest du Conseil Priué du Roy, nonobstant l'interuention du Clergé, qui auoit pourtant meilleure raison de demander & d'esperer de ce costé-là l'exécution de son contract de 1606. & par consequent de ladite declaration qui en faisoit tacitement vne des clauses & conditions.

Neanmoins vn pourueu par le Chapitre du Doyenné de l'Eglise Collegiale de Pimboe, dont elle est la premiere dignité, s'estant pourueu audit Conseil Priué en cassation d'un Arrest du Parlement de Bourdeaux, par lequel vn nommé Triquoy simple Maistre és Arts, auoit esté maintenu en la possession dudit Doyenné en vertu de sa nomination: le Conseil sans auoir esgard aux moyens d'interuention du Scindic du Chapitre, qui raportoit mesme quelques titres en forme de statuts, par lesquels on pretendoit que ceste dignité estoit electiue; & sans auoir égard mesme à l'interuention des Agens du Clergé qui soustenoient que ledit Arrest du Parlement de Bourdeaux estoit contraire à ladite declaration de 1606. de laquelle ils demandoient l'exécution, dont le dernier article porte en termes exprez, que nul ne pourra estre pourueu des dignitez des Eglises Cathedrales, ni des premieres dignitez des Eglises Collegiales, s'il n'estoit Gradué en Theologie ou en Droit Canon. Le Conseil, dis-ie, sur les demandes en cassation d'Arrest, mit les parties hors de Cour & de procez.

Et neanmoins où est-ce que le Clergé auoit plus de suiet d'esperer le succez de ces pretensions qu'audit Conseil, où les contracts qu'ils auoient faicts avec le Roy ont esté passez.

Il a encores esté iugé pour la Theologale de l'Eglise de Beauuais, le 13. Fevrier 1642. en faueur d'un nommé S. Symon Gradué nommé.

Par ces Arrests, la Cour recognoist que les dignitez des Eglises, tant Cathedrales que Collegiales ont esté adiugées à des Graduez nommez; & ainsi que c'est sans raison quel'on en pretend exempter la Tresorerie de Rouën, quand bien il seroit constant qu'elle seroit vne dignité.

En quatriésme lieu, si la Cour a restraint la disposition de ladite declaration de 1606. les Euesques ont d'autant moins de suiet de s'en plaindre qu'eux-mesmes l'ont restrainte aussi, car ayant fait imprimer tous les Edicts & Declarations qu'ils ont obtenues de nos Rois en leur faueur, ils y ont fait des apostilles, & au dessous de ce second

Art. de la Declaration à l'endroit de ces mots, *Or d'autant que les dignitez*, il y a vne apostille qui renuoye pour l'explication à ce second Art. de la Declaration de 1596. qui ne parle que des premieres dignitez. Et ainsi dans les termes de ceste explication, l'on restraint la declaration aux premieres dignitez, & ce avec tres grande raison, car puisque la declaration de 1596. auoit esté le modelle sur lequel celle de 1606. auoit esté faite, la disposition de l'une doit bien estre réglée par l'autre.

Et pour confirmer cela, il s'ensuit encores par la raison que l'Article mesme rend de sa propre disposition en ces termes, *d'autant que les dignitez des Eglises Cathedrales requierent personnes de suffisance & qualité*. Il s'ensuit, dis-ie, qu'en tout cas l'on ne pourroit pretendre que cette disposition pust auoir lieu, si ce n'est pour les dignitez qui requierent qualité & suffisance.

Or les dignitez qui requierent qualité & suffisance ce sont seulement celles auxquelles est attaché iurisdiction.

Aussi est-ce pour celles-là que les Euesques auoient vn tres-specieux pretexte de demander au Roy que le choix libre & absolu d'y pouruoir leur fust laissé, pource que la iurisdiction Ecclesiastique, en ce qui depend de l'ordre, estant originairement vnue à leur personne à cause de leur onction Episcopale, les autres Ministres de l'Eglise n'en ayant aucune part, que par communication, & comme leurs Vicaires, ils ont quelque interest pour la descharge de leur conscience que personne n'y soit admis sans leur consentement.

Mais ces considerations ne peuuent auoir lieu à l'esgard des dignitez, ou plustost personats, qui n'ont aucune iurisdiction, comme la Thresorerie de l'Eglise de Rouën, qui n'a que la garde des vases sacrez, des ornemens, & des cierges, pour la fondion de laquelle par consequent il n'est pas necessaire d'auoir beaucoup de suffisance.

Aussi Monsieur l'Archeuesque de Rouën n'a point fait difficulté d'en pouruoir depuis ladite Declaration de 1606. vn nommé Caniuet.

L'acte de sa prise de possession est produit par ledit du Val qui fait foy, que ce nommé Caniuet n'estoit pas Gradué, d'où il faut infailliblement conclure.

Ou que Monsieur l'Archeuesque de Rouën n'a pas estimé luy-même que la Thresorerie de son Eglise fust vne dignité.

Ou

Où que la Declaration de 1606. fust en vſage.

En dernier lieu, puis que par la diſpoſition du dernier article de cette Declaration de 1606. les dignitez ſont tellement affectées aux Graduez, que les Collateurs ordinaires ne les peuuent conferer qu'à ceux qui ſont Graduez en Theologie ou en Droit Canon. Pourquoy ceux qui ſont Graduez en l'vne ou l'autre Faculté, n'y pouront-ils pretendre en vertu de la nomination de l'Vniuerſité qu'ils auront outre leurs degrez.

Car autrement il arriueroit vne abſurdité tres-grande, comme parle Monsieur Guimier, *redderentur nominati qui in ſtudijs resident deterioris conditionis quam Graduati ſimplices, cum tamen qualitas nominationis ſit ſuperinducta ad augmentum Graduatorum*, qui eſt le raisonnement dont ſe ſert ce grand perſonnage pour prouuer que *debent dignitates cadere ſub nominationibus, ſicut ſub gradu*, pource que adiouſte-il encores *nominatio fundatur ſuper gradu, & ideo adiecta Gradui cum non alterat, qualitatis enim adiectio non alterat ſubſtantiam*.

*Commentaire ſur
le concordat au
tit. de collat.
ſ. item placuit.*

Outre la Declaration de 1606. du Val produit encors vn Arreſt de la Cour, donné en 1638. pour le Doyené de Soiſſons, par lequel il pretend que les Graduez nommez ont perdu leur cauſe à l'eſgard des dignitez des Eglises.

Le Fevre reſpond en vn mot que l'eſpece de cet Arreſt eſt bien differente de celle qui ſe preſente à iuger: Il eſt icy queſtion d'un Benefice purement collatif, & lors de l'Arreſt il eſtoit queſtion d'un Benefice electif, où toute la conteſtation n'eſtoit point de ſçauoir ſi le Doyené de Soiſſons eſtoit vne dignité, perſonne n'en diſconuenoit, mais bien de ſçauoir en effet ſ'il eſtoit electif.

Le Gradué qui le pretendoit en vertu de ſa nomination, ſouſtenoit qu'il n'eſtoit point electif, & pour cela auoit interieſté appel comme d'abus de l'election faite par le Chapitre au preiudice de ſon droit.

Il eſtoit ſouſtenu au contraire de la part de celui qui auoit eſté pourueu par le Chapitre, & de la part du Chapitre meſme qui eſtoit interuenant, que le benefice eſtoit electif, & l'on en raportoit les ſtatuts, & la preuue d'une longue poſſeſſion. Et ce fut ſur ces conſiderations que la Cour debouta le Gradué nommé.

Et encores que ce Doyenné de Soiſſons ſoit du nombre de ces benefices que l'on appelle *Electifs collatifs*, l'on ſçait que ce mot de *collatifs* n'y a eſté adiouſté par les Docteurs que pour en faire la di-

stinction d'auec ceux que l'on appelle *Electifs confirmatifs* qui requierent outre l'election faite par le Chapitre, la confirmation de l'Euesque ou autre superieur, laquelle tient lieu de prouision à celui qui a esté élu.

Mais pour les autres benefices pour lesquels l'election faicte par le Chapitre suffit, sans la confirmation & prouision du superieur, ils sont nommez *Electifs collatifs*, pource que l'election vaut collation & prouision; & c'est en ce sens que l'on dit d'ordinaire, *eligendo conferunt & Rebuffe. Alia beneficia dantur per viam electionis non tamen requiretur confirmatio & dicuntur collatiua*. Mais tant y a que dans l'une & l'autre espece, la diuersité des sentimens & la pluralité des suffrages conseruant en soy l'image des anciennes Elections, que la Cour a tousiours maintenu tant qu'elle a pû, elle en a aussi voulu également exclure les nominations des Graduez.

Cet Arrest ne peut doncques estre appliqué à l'espece de cette cause, où il est question d'un benefice purement collatif, *qui per viam electionis non datur*.

Voila quant au premier moyen de du Val, auquel le Fevre espere auoir suffisamment satisfait.

Voici le second qui consiste en ces deux chefs principalement :

Le premier, qu'il est preferable à le Fevre, quoy que postérieur en nomination, en qualité de Lecteur & Professeur Royal en Theologie.

Le second, qu'en tout cas estant nommé comme Docteur, le Fevre ne l'estant qu'en qualité de Maistre és Arts il doit l'exclure.

Pour prouuer le premier du Val se sert de l'art. 54. du statut de la reformation de la faculté des Arts, dont il a esté parlé ci-dessus, il ne le faut ici que transcrire, pource que la seule lecture suffira pour faire connoistre que l'on en tire vne mauuaise induction,

Et plures ad docendum inuitentur, Magistri Artium qui per septennium continuum absque intermissione & citra fraudem, in celebri collegio publice docuerint præferantur omnibus graduatis in iure nominationis exceptis Doctoribus in Theologiâ tantum.

Il se voit clairement par ces termes qu'il n'est parlé que des Maistres és Arts, *Magistri artium qui per septennium, &c.* pour iouir du priuilege de la regence aux droicts de nomination, à l'exclusion de tous les autres Graduez, à la réserve des Docteurs en Theologie

seulement, & par consequent cet article ne s'entend que de ceux qui enseignent les humanitez ou la Philosophie, a qui il suffit d'estre Maistres és Arts: mais il ne se peut iamais entendre de la regence en Theologie, puis que pour en estre Professeur, il ne suffit pas d'estre Maistre és Arts, il faut estre Docteur.

Daillours pour faire lecture publique de Theologie il ne suffit pas d'estre inuité, comme pour la faculté des Arts, *ut plures ad docendum inuitentur*, mais il faut estre esleu & choisi par les suffrages des Docteurs.

Apres tout; cet article est au nombre seulement des Statuts de la reformation de la Faculté des Arts distincts & separez des Statuts des autres Facultez de Theologie de Droit Canon, & de Medecine, & par consequent il ne peut en aucune façon estre estendu ny appliqué à pas vne autre, non plus que le statut d'un College aux statuts d'un autre College.

Car lorsqu'il fut question de proceder à la reformation de l'Université en 1598.

Comme elle est composée de quatre differentes Facultez, assavoir de la Faculté des Arts, de la Faculté de Medecine, de la Faculté de Droit Canon, & de la Faculté de Theologie, l'on fit aussi quatre Statuts distincts & separez.

Les Statuts que l'on fit pour la Faculté de Theologie, furent composez de cinquante articles.

Ceux de la Faculté de Droit Canon de 37.

Ceux de la Faculté de Medecine de 66

Et ceux de la Faculté des Arts de 98. desquels le Statut dont est question fait le 54.

La Cour peut iuger par là, s'il y a apparence d'estendre le Statut d'une Faculté à vne autre, contre les termes formels de sa disposition, qui d'ailleurs contenant un privilege en faveur des Regents en la Faculté des Arts y doit estre restraints, n'y ayant iamais d'indentité de raison assez forte pour estendre un privilege d'un cas à un autre qui n'est point exprimé.

Davantage il n'est pas possible de s'imaginer que l'Université eust voulu donner des privileges, & proposer des recompenses, à des Lecteurs & Professeurs Royaux, soit en Theologie ou en quelque autre Faculté, qui sont bien stipendiez & gagez.

Qui daillours ne la recognoissent point pour leur mere, mais pretendent ne deuoir recognoistre que Monsieur le grand Aumosnier de qui ils dependent.

L'Vniuersité a voulu seulement donner des priuileges à ses enfans, qui rendroient actuellement seruire, & gratuitement au public en l'instruction de la jeunesse, en la Faculté des Arts, dont la Profession estoit presque abandonnée par les abus qui s'estoient introduits.

Pource que la plupart prenoient le degré de Maistre és Arts, non pas pour en faire aucune fonction, mais seulement pour s'acquérir par ce moyen l'esperance d'auoir des benefices, & ainsi les Colleges demeurant deserts, l'instruction de la ieunesse estant presque abandonnée pour les exciter ou inuiter, comme dit le statut, à en prendre le soing, l'Vniuersité leur a donné des prerogatiues par dessus les autres Graduez.

Enfin quand il seroit vray que du Val auroit le priuilege de la regence conformément au statut (ce qui n'est pas) il ne pourroit pas s'en preualoir au preiudice de le Fevre, qui est Docteur en Theologie, & par consequent excepté de la disposition du statut.

Quant à ce que du Val dit, que le Fevre encores que plus ancien nommé, n'estant nommé pourtant qu'en qualité de Maistre ez arts ne peut estre preferé à luy qui est nommé comme Docteur.

Le Fevre n'oppose à cela que la disposition expresse du Concordat, qui donne perpetuellement la preference *Antiquiori nominato*.

La distinction & difference des degrez ne se considere iamais que lors que les nominations de deux Graduez se rencontrent de mesme année. Quant la disposition expresse du Concordat.

Car alors l'on prefere le Bachelier au Maistre és Arts, le Licencié au Bachelier, & le Docteur au Licencié, mais hors cette concurrence de mesme année cette preference de degré a degré cesse.

Or ici il n'y a point de concurrence de mesme année.

Le Fevre est plus ancien Gradué nommé que du Val sans contredit, & estoit licencié en Theologie six mois auant la vacance du benefice.

Il est nommé dès 1634.

Du Val ne l'est que de 1639.

De plus, quand au cas de concurrence de mesme année, l'on considere la qualité des degrez, ce n'est pas seulement la qualité du degré employé dans l'acte de nomination que l'on considere.

Car si cela estoit, ceux qui n'auroient esté nommez, par exemple, qu'en qualité de Maistre és Arts, ne se mettroient pas en peine de tra-

uailier pour faire progrez dans les sciences, & en acquerir les degrez, puisqu'ils verroient que tout ce qu'ils pourroient edifier sur ce premier fondement leur seroit inutile, & ne leur feroit pas esperer plus de recompense.

Cette prerogative de l'ancienneté de nomination, n'a souffert du déchet qu'en faueur des Regens de l'Vniuersité de Paris par l'art. 54. du statut de la Reformation de la Faculté des Arts, dont il a esté parlé, & par l'art. 17. de l'appendix de ladite Reformation.

Qui estans les titres principaux en vertu desquels le Fevre exclut Nicolas Larcheuesque, encores que plus ancien nommé.

C'est en ce lieu que le Fevre commencera à respondre à ce qui luy est obiecté par ledit Larcheuesque, qui soustient premièrement que ces statuts ne se doiuent entendre qu'en concurrence de mesme année.

Pour satisfaire à cette obiection, il ne faut que lire ledit art. 54. *preferuntur omnibus graduatis*, cela comprend aussi bien les plus anciens nommez, comme ceux qui l'auroient esté concurremment en mesme année.

Qui dict tout, n'excepte rien, s'il n'y a vne exception expresse qui suiue, comme en ce mesme article, les Docteurs en Theologie en sont seulement excepte.

Toute exception confirme la regle pour le reste.

Mais après les arrests solempnels qui l'ont iugé, il n'y a pas ombre de difficulté.

La question s'estant présentée en 1606. entre vn nommé Riviere ancien Gradué nommé, & Placet Regent en l'Vniuersité de Paris, Monsieur l'Aduocat General Seruin, ayant remonstré que la question ne dependoit point de l'antiquité des degrez ny de la nomination, Riviere estant plus Ancien nommé sans contredit, mais bien de l'art. 54. de la reformation de la faculté des Arts de l'Vniuersité de Paris, Placet quoy que posterieur en nomination fut maintenu & gardé en la possession du bénéfice contentieux à cause du priuilege de la Regence.

En 1633. il a encores esté iugé au profit du sieur Padet ancien Regent de la Faculté des Arts au College d'Harcourt pour la Chapelle d'Ozonville, au Diocese pe Roüen.

Ou par la requeste d'un nommé saint Germain, partie aduersse, employa pour contredits contre la production nouvelle dudit Pa-

det qui produisoit ledit Statut de l'Vniuersité & l'attestation de sa Regence, il se voit que l'on soustenoit que ledit Statut n'auoit pû déroger au concordat qui donnoit perpetuellement la preference *antiquiori nominato*.

Et que quand il y auroit derogé qu'estant Gradué nommé dès l'année 1578. vingt ans auparauant le Statut, ledit Statut estant postérieur n'auoit pû faire preiudice à vn droit qui luy estoit desia acquis.

Nonobstant Padet fut maintenu.

Et cette derniere circonstance par laquelle on voit que le Statut a eu vn effet retroactif est d'autant plus considerable que l'on en peut induire que la Cour iugea par cet Arrest que ledit article 54. de la reformation de la faculté des Arts n'estoit pas tant vne derogation ou addition, & supplement aux pragmatiques & concordats qu'une explication & vne demonstration plus expresse de leur intention, qui estant de favoriser les gens de lettres, a bien voulu que ceux qui en feront profession particuliere en rendant actuellement seruice au public eussent des prerogatiues par dessus ceux qui demeurent dans l'oisiuete apres auoir pris des degrez ou de Maistres és Arts ou de droit Canon.

Il reste maintenant à faire voir que le Fevre a enseigné en l'Vniuersité de Paris, conformément aux Statuts.

Il en raporte en forme autentique l'attestation des sept années continuelles.

La premiere année de sa Regence a esté dans le College de Montaigu, College celebre où il a enseigné les humanitez dans la troisieme Classe depuis la S. Remy 1633. iusques en 1634. ayant eu plus de quatre vingts Escolliers.

La seconde année de Regence a esté au College du Plessis, aussi College celebre y faisant la troisieme classe.

La troisieme, quatrieme, cinquiesme & sixiesme années de regence dudit le Fevre ont esté dans le College de Rheims, où il a fait deux cours de Philosophie tout complets, où il a eu quantité d'Escolliers, qui à present sont sur les bancs de Sorbonne.

Et la septiesme année est depuis la S. Remy 1639. iusques en 1640. qu'il a exercé la fonction & la charge de Principal au College de Beauuais: fonction qui a le mesme priuilege que celle d'enseigner, suivant l'art. 17. de l'appendix de la reformation de la Faculté des Arts, durant lesquelles sept années le Fevre a encores exercé les

charges de Procureur de la Nation d'Examinatur des Arts à sainte Genevieve.

Ce seroit icy le lieu de marquer les nullitez qui se rencontrent aux titres & capacitez dudit l'Archeuesque.

1. Il s'est fait nommer comme licentié en Droit Canon, & n'a qu'un temps d'estude de cinq ans, là où il en faut un de sept par le Concordat.

2. Il s'est fait passer Bachelier & licentiez en Droit Canon en quinze iours, ce qui fait son degré nul pour pretendre un Benefice un vertu dudit degré.

3. Il a esté vingt-trois ans continuëlement dans l'Oratoire, comme il est verifié, durant lequel temps il dit auoir estudié au Droit Canon.

Enfin la Cour sçait l'abus & la facilité qu'il y a à obtenir des degrez en cette Faculté. De plus, si ledit Archeuesque se dit Predicateur, on dit que le Concordat n'est pas fait pour les Predicateurs; Ioint que ledit le Fevre en pourroit prendre le titre, comme il en rapporte certificats.

Enfin pour conclure la Cour est tres-humblement suppliee d'observer que le Fevre apres auoir consommé la plus grande partie de sa vie au seruice du public, sans auoir iusques à present eu aucunes recompense.

Il seroit assez estrange que le fruit de ses travaux luy fust rauy par du Val, qui est tres-bien remply, ayant un Prieuré de quatre cens liures de rente, & la chaire de Professeur Royal, qui luy vaut neuf cens liures, & encores d'autres Benefices qui ne sont pas de peu d'importance.

Il doit sçauoir qu'il a esté recompensé auant que d'auoir travaillé estant pourueu aussi tost de la chaire de feu son oncle, son merite & la faueur des Prelats qui le recognoissent en consideration de son oncle, luy peuuent encores faire esperer de nouueaux Benefices. Il doit auoir compassion de son confrere, qui pour toute recompense de ses travaux pour le public n'a qu'une habitude de simple Prestre en l'Eglise S. Paul; S'il a encores quelque sentiment de pieté, il doit sçauoir que ce luy est une honte de vouloir ruiner l'Vniuersité sa bonne mere, l'attaquant oppiniaistrement, & pretendant faire donner des Arrests nouueaux contre ses droicts, C'est cette bonne mere qui l'a esleué si tendrement, & fait subsister avec esclat iusques à present,

neantmoins pour toute recognoissance il la veut opprimer en l'extre-
mité de ses miseres, & dans vn siecle là où tous ses priuileges, quoy
que iustes, luy ont esté contestez, mais elle espere en cette cause
que la Cour, qui luy a tousiours esté vn azile en ses extremitéz, luy
fera la defense en ce rencontre.

Monsieur BOVGIER, Rapporteur.

